

## RIJEČ UREDNIKA

Haris HALILOVIĆ

Poštovani čitatelji,

pred Vama se nalazi novi dvobroj časopisa Kriminalističke teme koji donosi četiri nova rada s područja kriminalistike, kriminologije, sigurnosti te krivičnopravnih disciplina. Radovi specifično tretiraju problematiku privrednog kriminaliteta, terorizma, medijacije u okolnostima počinjenja krivično djelo te postupanja ovlaštenih službenih osoba. Tako rad *Morfologija nepravilnosti u izvršenju budžeta i finansijskim izvještajima, korištenju resursa i upravljanju državnom imovinom u Federaciji Bosne i Hercegovine*, predstavlja opis nepravilnosti u upravljanju financijama, korištenju resursa i upravljanju državnom imovinom, koje se pojavljuju u radu javnog sektora u Federaciji Bosne i Hercegovine, a koje se mogu dovesti u vezu sa korupcijom. Znanstveni radovi s ovom tematikom, u Bosni i Hercegovini su danas iznimno rijetki, te je za očekivati da će ovaj rad svojim sadržajem privući značajnu pažnju znanstvene i stručne javnosti. *Postoji li psihološki profil teroriste?* - rad je koji tangira na međunarodnoj ali i nacionalnim razinama aktuelnu problematiku terorizma, specifično individualnih, grupnih i društvenih karakteristika koje mogu biti od utjecaja na formiranje ličnosti teroriste. Nesumnjivo, jako vrijedan rad s područja suprotstavljanja terorizmu koji može doprinijeti boljem razumijevanju ovog problema u savremenim uvjetima. Rad *Perspektive modela: Medijacija između žrtve i maloljetnog počinitelja kaznenog djela u kaznenopravnom sistemu Federacije Bosne i Hercegovine*, razmatra poseban model medijacije u okolnostima kada se kao počinitelj krivičnog djela pojavljuje maloljetna osoba. Ovaj model trebao bi doprinijeti prevenciji maloljetničkog prestupništva ali i drugim ciljevima krivičnoga zakonodavstva kada su u pitanju maloljetnici kao počinitelji krivičnih djela. S obzirom na temu koju tretira, ovaj rad ima kapacitet da doprinese unaprijeđenju postupka medijacije u Bosni i Hercegovini te posebno prevenciji maloljetničkog prestupništva kao i položaju maloljetnika u sukobu sa zakonom. Konačno, rad *Kriminalističke procedure Granične policije kod krijumčarenja oružja i vojne opreme*, sa stručnog stajališta, prezentira postupanja ovlaštenih službenih osoba Granične policije onako kako je to propisano odgovarajućim zakonskim i podzakonskim propisima u Bosni i Hercegovini s posebnim osvrtom na postupanja u slučaju krijumčarenja oružja i vojne opreme. Kvalitetan stručni rad koji će pronaći svoje mjesto u daljem razvijanju adekvatnih procedura suprotstavljanja kriminalitetu od strane pripadnika Granične policije Bosne i Hercegovine.

Koristim također i priliku da se zahvalim svim autorima, odnosno koautorima na dostavljenim radovima, kao i redakciji Časopisa čiji je ovo prvi autorski broj, na uložnim naporima, da se zainteresiranoj znanstvenoj i stručnoj javnosti predstave istraživanja na područjima kriminalistike, kriminologije i sigurnosnih studija.

Glavni i odgovorni urednik  
Prof. dr. sc. Haris Halilović